



UNIVERSITÄTS-  
BIBLIOTHEK  
PADERBORN

## **Hortulus Biblico-Moralis Et Asceticus**

**Pappus von Tratzberg, Franz**

**Ulm, 1725**

Doctrina 2. Desumpta ex cap. 15. lib. Genesis, in quo describitur Promisso  
Prosperitatis Abrahami, & Pactio fœderis cum eo.

---

[urn:nbn:de:hbz:466:1-61252](https://nbn-resolving.org/urn:nbn:de:hbz:466:1-61252)

bulans in via immaculata hic mihi ministrabat. Ut enim carbo frigidus ex contactu ferventis ignescit; ita tu licet frigidus & tepidus in virtute nunc existas, accenderis à piorum consortio, tuarum passionum Victor futurus cum Abrahamo, tam gloriose de hostibus suis triumphante.

## Doctrina 2.

*Desumpta ex cap. 15. lib. Genesis, in quo describitur Promissio Prosperitatis Abrahami, & Pactio fœderis cum eo.*

*Considera:* QUàm sedulam illorum curam gerat Deus, qui ei instar N. 24.  
Abrahæ fideliter serviunt. Tales certè divinâ fœcundati gratiâ non absque copiosa meritorum prole discedent ex hac mortali vita. Imò innumeros penè post se spirituales filios relinquent, qui haustam ab eis Doctrinam ad extrema mundi tempora propagabunt. Tam fœcundus Abraham existit Sanctissimus Pater meus Benedictus, & post eum alii ordinum Fundatores, qui usque in hanc diem Posteris, virtutum splendore stellis pares, numerant. Tales viri dum vixerant in terris, Abrahamum morali sequelâ imitati, fumebant indomita passionum suarum animalia, eaque mortificationis cultrô per medium secabant: ex imo contriti pectoris columbæ instar tam propriis, quàm alienis delictis ingemendô. Fuere quidem plures malæ vitæ homines, qui rapacium volucrum instar eorum virtutes tam verbis quàm factis impetivere, sed fama Sanctitatis & miraculorum potentia, quæ cum sole percurrebat totum Orbem, tam nefandos impetus abigebat. Hæc considerans Christiane stringe pariter mortificationis cultrum in animalia appetituum tuorum: seca per medium quidquid illiciti affectûs ad carnis illecebras in te vivit. Macta quidquid in te cupiditatis ardet ad fluxas mundi divitias, dabis haud dubiè gratissimum Deo Sacrificium, & colliges inde ceu alter Abraham ingentem meritorum copiam. *Si superbiam corporis tui vincas, ait Origenes, immolas Deo vitulum; si iracundiam, arietem, si libidinem, hircum; si vagos & lubricos cogitationum volatus, columbam & turturem.* Oportet superari vinctique concupiscentias, ut corpori congruat ratio victimæ. Mactari debent appetitus animæ, ut nomen Hostiæ illa sibi vendicet; adhortante, & precibus nos urgente Apostolo

D

stolo

stolo Rom. 12. *Obsecro vos per Misericordiam Dei, ut exhibeatis corpora vestra Hostiam viventem, sanctam, Deo placentem, rationabile obsequium vestrum. Viventem inquit, novâ vitâ Spirituali extinctis inordinatis appetitibus. Viventem inquit: ut nempe discretionis cultrô occidamus carnis illecebras, ut carnem ipsam non occidamus cum illis, sicque moriatur caro, ut vivat, & vivat, & moriatur. Moriatur peccatis, moriatur concupiscentiis, moriatur amori proprio, moriatur humanæ laudi, moriatur mundo. Vivat bonis operibus, vivat proximorum saluti, vivat perfectioni, vivat Christo, vivat Deo. Hoc si feceris, satisfecisti Apostoli petitis; Sic enim dedisti Hostiam Deo placentem. Repere est tales, qui mortificandô se exhibent Deo hostiam quidem viventem, sed neutiquam placentem. Carnem jejuniis macerant, tergum flagellis cædunt, longas orationes fundunt. Et tamen cum Israelitis gemunt Isaïæ 58. *Quare jejunavimus, & non accepisti? humiliavimus animas nostras, & nescisti?* audientes responsum Dei: *in jejunio invenitur voluntas vestra.* Bona licet in se fuerit hostia, vivens & sancta; placens tamen non fuit, quia in offerenda illa non meam spectastis voluntatem: occisâ carne adhuc vixit propria voluntas, & hâc vivente potuit adhuc in vobis vivere appetitus vanæ gloriæ, laudis humanæ, proprius amor. Enim verò quis nescit: veteres Philosophos mortificationi ita studuisse, ut etiam piissimos vicissent Christianos. Fuerunt hostiæ vivæ, sed tamen Deo displicentes; quia carne exteriùs tam rigidè mortificatâ vivebat adhuc Voluntas propria, vanæque laudis desiderium; & hinc quò magis mortificatione placere studebant hominum oculis, eò magis displicebant Deo. Talem utique Hostiam non te offeres Christiane Lector.*

N. 25. *Considera porrò: Quomodò hominibus impiis Deus certam constituat peccatorum mensuram, quâ completâ eos puniat, prout puniit Amorrhæos & Cananæos, atque alios ejusmodi populos, qui pro temporali suorum criminum pœna à Posteris Abrahæ devicti, pro æterna verò in Tartarum deturbati sunt. Quare si urgeat te gravis tentatio, cogita: quòd si consenseris in delictum, forsan per illud ipsum compleatur mensura peccatorum tuorum, & sequatur ultio divina.*

Doctri-